

Videtur sic collegisse, vel debent omnia esse à DEo, ut ab ipso ex nihilo fuerint facta, vel ut ex ipsis natura sequantur; At illam productionem ex nihilo habuit pro absurdâ & contradictione, ad alterum ergo modum maluit deflectere. Quid & DIPPELIUS l. l. §. IIX. allegatis hanc propter regulam procul dubio scripsit: Der Begriff von dem Lichts, aus welchem alle Dinge sollen geschaffen seyn, hat mir manches mahl den Kopf zerbrochen. Item: Das der Concept von dem absoluten Lichts, aus welchem alle Dinge sollen geschaffen seyn, weder mit dem Verstand, noch mit der H. Schrift harmoniret. Ad rem igitur quod attinet, observandum est, universales Regulas Philosophicas maximam partem ex rerum singularium observatione, per inductionem, formatas esse, quomodo omnes ideæ universales in mente oriuntur: unde inductione singularium probari, vel confirmari solent. Quandoquidem vero non nisi naturalia sensibus observantur, factum hinc est, quod & de naturalibus duntaxat rebus Regulas istas prisci formaverint, ad quas etiam solas restrictæ intelligi deberent. Si vero ultra naturalium sphæram extensæ divinis ac supernaturalibus applicantur, aliter fieri nequit, quam quod varios pariant paralogismos. Ita, dum experientia docuit, nec naturam nec artem quidquam producere, nisi ex præacente quadam materiali producat ipsum, hinc enata Regula est, axiomatis quasi vim habens: Nihil quidquam ex nihilo, i. e. nulla præexistente materiali, fieri posse. Quæ, habito respectu potentiae naturalis, omnino recte se habet atque verissima est; at sicuti tam late & abstractè sumatur, ut de quacunque potentia, infinita & que ac finita, actuque non solum naturali, sed & supernaturali, intellecta DEo etiam applicetur, ac si DEus quoque non possit aliquid ex nihilo producere, falsissima evadit, à primo suo & nativo, ut sic dicam, vero sensu degenerans. Quantumlibet enim repugnet, finitam creaturam aliquid ex nihilo producere, siquidem productio ex nihilo actionem infinitam dicit, infinitamque præsupponit potentiam, nihil enim in infinitum nihil est; DEum tamen omnipotentia suâ infinita quidquam ex nihilo

D

creare,